



*Kamis, 30 September 2021*

**Ogen: Kejadin 13:8-13**



**Bene Adi Tergoda**



Megati kal ibelasken kata persinget gelah ula kal kita tergoda. Tergoda ertina, ipengaruhi sada-sada hal entah e barang, erta, rupa nta pe cakap penaki-naki. Godan enda mbelin kal ncedai geluh manusia. Hawa ndabuh kubas dosa erkiteken tergoda si iblis, merincuh pentar seri ras Dibata.

Arah renungenta senda nuriken kerna kegeluhen Abraham ras Lut kenca nadingken Mesir. Tuhu-tuhu Abram ipasu-pasu Dibata, ia bayak namura. Lut si ras ia pe berkat i Haran nari enggo ka lit jabuna rikut erta-ertana. Ibas kegeluhen si mandiri turah persoalen ibas suru-suruhan siermakan biri-birina kerna mbal-mbal ingan ermakan. Alu bijak Abraham ndarami dalam puluh ibas kecibal sibage rupana, sirang berbagi erta ras taneh gelah la tambah persalen kulebe wari enda, bageme perukuren Abraham. Ibas erbagi isuruhna Lut lako milih taneh siapai atena, tentuna ibas milih dengen lit kesempatan milih sipilih ita singena ateta rikut kulebe wari enda pe menjanjiken. Bageme ipilihna baluren Jornan seh kempak kuta Soar si melala launa, tuhu-tuhu taneh simehumur. Jenari lawes Lut kuarah Timur, ijeme ia sirang, Abraham ringan i Kanaan dengen Lut deher Sodom, kalakna jahat ras erdosa man man Dibata. Terdauhen sieteh kuga turiturin geluh Lut ras isi jabuna.

Bageme kegeluhenta, ibas taneh si mehumur, mejile si mereken kemakmuren, kebayaken ras erbage kesangapen jadi sada keriahen ukur. Tapi ibas taneh e kepe la sitik godan sierbahan kegeluhen jabu, kinitekenta ras kegeluhen sosialta ceda. Erbage pinakit sosial turah ije siarus sitengeti. Adi kemakmuren ras kebayaken geluh la iikuti masarakat si mehuli banci ceda silit. Arus kepe kita metenget ibas nentuken pilihan.